

東
華
續
錄

東華續錄

咸豐三十八

臣王先謙敬編

臣陶澐宣恭校

閏七月戊辰朔諭內閣楊需奏勦辦安陸賊匪連獲勝仗收復府城一摺前因京山縣土匪勾結粵匪竄擾安陸府城失守當令楊需酌派將弁督兵進剿迅圖克復茲據奏稱七月十三日都司劉富成會同代辦安陸府事方卓然等分路夾擊殲賊五六百名守備石清吉等帶兵潛赴東門外埋伏劉富成帶兵直薄賊壘鼓譟進攻立毀賊營賊眾大潰城中賊匪亦驚惶逃竄多爲伏兵截殲斬擒千餘名劉富成入城搜捕藏匿餘匪駢斬殆盡立將郡城收復等語著該署督一面酌留兵勇將竄逸餘匪盡數搜殲勿留餘孽一面親督大兵直搗武漢賊巢務將楚省賊氛迅速掃蕩○諭

軍機大臣等前有旨派令載齡崇實馳驛前往陝西查辦事件計程當已行近陝境茲發去何紹基參奏四川大吏收受陋規有礙辦公一摺並參奏該省辦理鄭懷江謀逆一案並無確據片一件著該侍郎馳驛徑赴四川將何紹基原奏各情逐款確查秉公辦理所有裕瑞等奏知縣楊得質盛朝輔訐告署藩司蘇敬衡案內摺三件單六件又南江縣監生鄭懷江謀逆案內摺二件片一件並疊次所降諭旨三道均著發給閱看將此由四百里諭令知之○諭楊需奏克復安陸府城並布置進兵情形一摺所籌三路進剿機宜頗爲詳晰其西取漢川東取黃陂兩路兵勇已不爲單安陸又經收復可無後顧之慮亟應迅速督兵前進不可再事耽延魁玉楊昌泗兵勇昨據官文等奏報已挑選二千名飭令統帶前往監利防堵楊需既藉此項兵勇爲東西兩軍策應著一面飛速

催提一面嚴飭襄陽府縣多備船隻迎候毋許稍涉遲誤昨據塔齊布曾國藩等奏報岳州克復以後復疊獲勝仗湖南水陸各軍已行至城陵磯以下當諭令速行東下與該署督爲三面夾擊之計並著楊需將如何會剿之處妥速咨商聯絡聲勢以期迅殲羣醜軍營情形變易靡常總須酌量緩急相機應變刻下雖船隻兵餉未能齊備亦當設法籌畫進剿不可坐待遷延致有貽誤將此由六百里加緊諭令知之○諭前因和春等奏賊竄霍山復撲六安請調臨淮兵一千名赴正陽堵剿當降旨令袁甲三飭令帶兵各員迅速前往茲據袁甲三奏霍山業已收復六安並無賊蹤見在臨淮更重於正陽其關山防勇經福濟遣散後又須派兵接守大致總在兵力單薄不能分赴正陽所奏尙屬實在情形惟六安霍山等處如果全無賊蹤則西路固覺稍鬆此時湖北黃州麻城

一帶全被賊踞英霍之賊儻亦如含山一路逆匪去而復來兩路仍形並重前所以令該副都御史與秦定三分紮臨淮正陽者原爲東西並扼本無畸重畸輕今秦定三旣專力舒城是西路之防已較東路稍弱袁甲三亦當妥籌兼顧互爲聲援不可因正陽距廬較近稍存諉卸之見至所稱近守關山尤須遠防江浦所籌尙是浦口防兵及江浦六合民勇疊據琦善奏報殺賊燬船尙俱得力本日復諭知琦善令其加意嚴防該副都御史仍應於臨淮以南關山左右設法嚴扼清流古稱險要扼守尙非難事所奏整頓團練虛實互用不過防守之一策若純用虛聲斷難深恃未可專倚浦口爲屏障遂置險要於不顧也將此由六百里加緊諭令知之○袁甲三奏南路擒匪疊次勦敗匪黨漸形解散六月十七日官軍由鎮橋前進適知州金光飭帶兵趕到合兵而行由蘆塘寺

王家岡一帶進剿匪眾五六百人開槍來迎我兵伏田埂下冒煙直上刀矛相接斃賊六七十人該匪奔竄復追殺一百餘人生擒首匪李連貫等七人進至蘆塘寺將各村之賊擊退賊趨余家灣一帶兵勇進擊焚其巢穴四處時己未申之間我兵收隊暫息又慮該匪之不甘心也隨將短礮埋伏高粱地內未及移時該匪復至我軍伏礮齊發火槍擡礮繼之匪眾驚竄共斃賊二百餘人二十日卯刻匪眾四五百人潛來劫營當經我兵擊退遂直擣余家灣老巢該匪屏息不動但於牆眼內開放槍礮我師連開大礮圍牆間有打破並將巢內屋角震塌轟斃賊首數人此鑪橋西路剿匪之情形也旋探東路逆匪有前來會合之信遂旋師鑪橋駐紮七月初四日拏獲奸細供稱該匪於土山岡另聚千人欲向鑪橋劫營後分赴余家灣一帶該文武乘夜進軍杜家莊追殺二十餘

人生擒賊首劉志哮等十人另由郭家莊突出之匪均被我兵蹙之河內幾無遺類其土山岡一股正在囁聚我兵先遣二百餘人繞伏岡西於東面放槍誘之該匪排列來撲我兵奮勇兜殺匪向岡西撤退伏兵突起截殺屍橫滿地是日共焚賊巢三處奪獲槍礮刀矛七十餘件十二日探聞該匪等在鐘橋三十餘里之荒沛橋朱家岡一帶官軍乘夜進襲該匪瞥見官兵倉卒迎拒兵勇一擁直前匪眾立敗窮追四五里道旁廟內忽出一百餘人意圖堵截我兵分投進擊斃賊四五十人生擒賊首陸與廷等九人奪獲擡槍九桿刀矛四十餘件此鐘橋東路剿匪之情形也臣見飭在事文武仍移營蘆塘寺務將余家灣老巢一戰而破然後整隊東趨直至定遠其附近大族如雍張朱單等姓見請具結改過立功贖罪而惡習既深尙難遽信已飭該文武隨時察看分別勦撫報

聞○己巳諭軍機大臣等英隆奏牛莊金州二處海口賊船搶劫情形一摺奉天沒溝營等處係商船雲集之區豈容賊船肆行滋擾七月初三日賊船三隻闖入沒溝營口岸膽敢向商船鋪戶逼索銀兩焚燒商船並有賊匪三人登岸兇鬧於初五日始被練勇等追逐出口何以該營汛各官毫無準備六月三十日羊頭窪口外有賊船三隻搶劫商船初三日停泊賊船既先被擊何以復敢由船登岸竟有三十餘人放火搶掠顯係官兵退避當此逆氛未靖之時海口巡防甚關緊要著英隆等卽飭水師巡船設法剿截偵探匪船三隻蹤迹併力追及盡數擒獲斷不准以駛赴外洋藉詞支飾並嚴飭地方文武於各海口要隘實力查拏仍督率紳民團練一體防緝毋稍疏懈將此由四百里諭令知之○諭勝保等奏督兵攻城斃賊多名一摺七月二十七日勝保等督率兵勇攻

撲高唐於西北城角用火箭然燒逆匪帳房五六架復開大礮擊倒望樓延燒帳房逆匪燒斃壓斃甚多其城南一面德勒克色楞亦親督各勇逼近城關燒其城樓擊斃賊匪此次攻剿州城兵勇尙屬奮勉惟逆匪先有準備以致未能克復失此機會殊覺可惜該逆數僅千餘我兵屢次進剿業經殲除十之五六若我兵四面同時進攻使該逆不能互相救應必可擣虛而入據稱賊於危急時尙能將西南守城之賊抽赴東北抵拒可見我軍未能悉力合圍著勝保等激勵各營將弁兵勇同心協力埽穴擒渠有能先登者立予重賞叢爾孤城當不難卽時克復務將此股逆匪就地殄除勿令乘間竄逸該大臣等圍剿已兩月有餘若再不知奮勉日事遷延以數百敗竄之匪牽掣全軍糜餉老師自問當得何罪見在軍營馬步兵及各勇口糧積欠甚多卽有他省撥款亦恐緩不

濟急當此攻勦喫緊之際自應設法籌辦以濟要需著崇恩嚴飭劉源灝無論何款迅速籌撥銀五六萬兩解赴勝保軍營毋再延誤將此由六百里加緊各諭令知之○庚午 硃諭巡防王大臣等見在連鎮逆匪雖未殲除而直順地方頗屬安靜所有雄縣霸州天津此三處防兵酌量應留應撤以節糜費以定人心再京師各門所添之兵爲日已久苦狀難堪若不變通留撤以後更不成事此時所撤之京師防兵俟直隸事竣後再行題奏酌量加恩再團防處儘可裁撤惟步軍統領兩翼總兵責任最重稽察緝捕固難多立章程反成虛套然終恐因時制宜有未盡善之處亦應妥籌以上各條著詳議三四日內具奏○駱秉章塔齊布曾國藩奏臣曾國藩偕鎮臣陳輝龍於十五日抵岳時賊雖屢敗尙盤踞城陵磯下游一帶又將漢口賊舟數千傾巢上犯連檣數十里陳輝

龍卽欲親督廣東水師出隊進剿臣屬以下游水急進易退難如遇南風不必開仗且沿江港汊慮有埋伏獲勝仍勿窮追十六日陳輝龍自坐挖罟督率所部前行褚汝航夏鑾分坐戰船繼進李孟羣尙未到岳其前隊廣勇先到者亦隨陳輝龍會剿左營彭玉麟右營楊載福均酌撥長龍三板藉作聲援時風色尙覺平靜行至城陵磯正遇該逆出隊上犯該鎮道等排陣合攻槍礮齊發轟斃賊匪多名燒燬賊船數隻賊卽下竄遊擊沙鎮邦礮船乘勝跟追陳輝龍見風勢愈大卽插旗收隊復恐沙鎮邦頭船有失督催挖罟趕往救護柰船身重大膠淺於激流旋渦中該逆見挖罟膠淺卽時繚擁而來湖港伏船亦出水師各船奔往救護又被風橫吹而下互相擁擠槍礮難施當被賊船擁近兵勇陷入重圍不能進退被賊戕斃多名陳輝龍沙鎮邦均卽陣亡褚汝航馳往拌救

手刃數賊與夏鑾均被重創落水殉難廣東署千總何若澧廣西帶勇候選府經歷唐嶸一同遇害計陳輝龍一營船礮盡失褚汝航夏鑾二營失去快礮四隻三板六隻李孟羣一營失去快礮四隻波山艇一隻長龍二隻三板四隻惟彭玉麟楊載福二營獨全十七日收集散亡點存礮械一面飛催省城所造三板等船以資添補十八日臣塔齊布親督陸營出隊適逆匪三千餘人由城陵磯舍舟登岸思欲踞險紮營並分三股來撲我軍亦分三路迎剿臣塔齊布匹馬當先兵勇奮力猛進陣斬悍賊十餘名截殺四百餘名該逆見中路已潰猶敢佯敗以圖合鈔官兵愈殺愈奮又斃賊匪三百餘名賊始敗走搶舟逃竄我軍截殺直追至擂鼓臺地方計其殲賊八百餘名落水死者無數查山東登州鎮總兵陳輝龍自到湖南以來造船製械事事躬親此次雖乘勝輕進而忠勇

奮發大節克全與同時陣亡各員一併懇恩賜卹其陸路戰勝出力各員并懇請恩施以昭激勸臣國藩未能極力阻止以致挫失應請將臣交部嚴加議處見在水路關鍵以城陵磯荆河腦爲扼要之區如能防守嚴密則西可扼由荆入蜀之門南可截由湖入湘之路惟荆河以上賊船游弋水師新挫上下勢難兼顧臣等惟有扼守要隘先清上游以期速殄逆氛上諭軍機大臣等駱秉章等奏水師失利陸路獲勝一摺覽奏曷勝憤懣我兵克復岳州水師疊獲勝仗方冀乘勢東下直搗武漢賊巢該提督等雖經屢勝仍當於銳進之中力圖萬全之策乃因輕進失利致鎮道陣亡失去船礮甚多雖塔齊布陸路得勝究屬得不償失曾國藩係在水路督戰於陳輝龍出隊時不能詳慎調度可見水上一軍毫無節制卽治以貽誤之罪亦復何辭惟曾國藩前經革職此時亦不

必交部嚴議仍責令督飭水師將弁奮力攻剿斷不可因一挫之後遂親望不前陳輝龍見已陣亡所有師船必須派員統帶李孟羣丁憂見在畱於軍營卽補遊擊楊載福屢次打仗出力卽可派該二員管帶省城所造三板等船著略乘章迅速催赴岳州毋稍遲延城陵磯荆河腦旣爲水陸扼要之區亟應嚴密防守杜其紛竄之路塔齊布仍督飭將弁兵勇乘勝進剿以期水陸夾攻迅殄醜類並隨時知照官文楊需一體截剿毋令賊匪紛竄爲要將此由六百里加緊各諭令知之○予湖南陣亡總兵官陳輝龍道員褚汝航同知夏鑾等湖北殉節道員李卿穀祭葬世職○辛未諭軍機大臣等前因直隸賊氛未靖桂良奏請將各該州縣案犯酌議犯罪情節其謀故兇盜拒捕殺人重犯法無可貸者卽行正法至情有可原及例應緩決各犯擬卽減等並將向擬情實免勾之

犯開單請減已經降旨允行茲據刑部議覆御史毓祿奏見辦軍務省分請變通辦理秋審一摺所有見在被賊滋擾之江蘇安徽山東湖北湖南等省雖據山東將本年秋審各犯題報到部外其餘各省均尚未具題到部若再令展限恐監禁之犯積而愈多兇狡之徒轉爲賊用自應變通酌辦以期消患未萌著各該督撫於接奉此旨後無論已題未題即將本年應入秋審後並上年停止各省分一概查照直隸省見辦章程其例應情實者立予正法若情有可矜及例應緩決各犯卽按應減罪名先行減等發配至暨事情實免勾並新事例應情實向俱免勾各犯亦卽由該督撫開單奏請減等仍將查辦原由迅速奏明遵辦總期獄無畱滯毋得稍事拘泥致有疏虞本日據駱秉章奏石門等縣絞犯難以解勘等語卽著遵照此旨辦理毋庸歸入下屆以昭畫一將此由五百

里各諭令知之○予湖南殉難知縣朱元增等祭葬世職○壬申
諭軍機大臣等琦善奏趕修多槳礮船圖克瓜州並瀝陳水師上
下游情形各摺所籌俱是粵省紅單船既形笨重自應多造適用
船隻以期輕捷琦善既稱旬日之內可以竣工則北岸水陸攻具
均已漸次齊備正可乘勝力攻瓜州斷絕鎮江賊踪聯絡之路向
榮前奏瓜州之賊有欲竄鎮江之說本日琦善奏奸細供稱瓜鎮
逆匪議分水陸上竄清淮等語大約賊情詭譎本無一定趨向瓜
州攻剿緊急則歸併鎮江亦在意中焦山下游堵截嚴密則上竄
清淮亦宜防範琦善向榮總當各就所有水陸兵勇或分或合悉
力籌辦若處處專恃設防而金陵鎮江瓜州三處負隅如故於大
局仍無裨益著琦善於礮船造齊後卽行設法力攻瓜州一面嚴
飭余萬清進攻鎮江果能同時並舉賊眾雖多亦將應接不暇豈

能肆其勾結奸謀至向榮所調吳全美紅單船並琦善續派上駛之挖管船爲數本不甚多以之防剿上游尙可扼守若竟恃有限之舟師徼倖嘗試冒險深入設有蹉跌則上游旣無機會可乘下游亦無以資控制著向榮卽將見在調到各船擇要布置相機攻剿總期嚴遏南岸賊踪旁竄之路使金陵之賊不能援救瓜州聯絡鎮江則下游剿辦自易得手毋庸多調船隻專赴上游一俟瓜鎮克復下游師船自能聯檣進剿船多勢壯攻擊方能得手也琦善向榮但當不分畛域合力妥籌毋得各執己見致誤事機將此由六百里加緊各諭令知之○癸酉諭軍機大臣等陳啟邁奏籌辦九江都昌賊匪一摺據稱大小賊船二千餘隻灣泊龍開河等處以潯城爲巢穴並在西門外築城安礮都昌地方復有賊船數百隻駛入該縣鄉勇與賊接仗該逆卽時颺去縣城得保無虞等

語逆匪竄踞九江郡城賊艇多至二千有奇都昌退出之船亦難保不歸併九江爲窺伺省城之計然不嚴扼九江但知退守省垣殊非長策該撫前奏於南康府上下將新造戰船三十號小船百餘號配載水勇二千有餘擇要駐泊並備火攻舟筏復選陸路兵勇二千名分紮兩岸爲犄角之勢統計水陸兵勇約四千有餘其續造戰船二十隻及廣東夷礮諒已齊備該撫見又派勇一千餘名馳往助剿兵力已不爲單此時自應嚴飭羅玉斌及候補知府元善統帶兵勇相機進剿破九江之賊巢即可固省垣之門戶即使郡城未能迅速克復而湖口姑塘皆係扼要之區亦當撥兵據險以牽掣賊勢九江郡城屢被賊匪蹂躪紳民遷徙逃避而本地文武各員又不駐守城內以致賊蹤來去自由鄉民無所倚恃何以繫屬人心辦理團練此時必須有文武大吏帶兵扼要駐紮若

湖口姑塘等處均有重兵足壯紳民之膽即可設法勸諭捐貲募勇其圖禦侮有能出江擊賊之人卽立予重賞並添造船礮併力堵擊見由武甯一帶調回官兵壯勇亦可酌量派赴下游要隘以助防剿若能扼住潯陽不特該省之藩籬可固卽長江全局亦可藉作聲勢留國藩克復岳州旋因輕進失利此時湖南舟師能否下駛尙未可知該撫務當統籌熟計不得藉口於餉絀兵單竟置九江於不顧也另片奏已革守備吳錫光懇恩從緩正法等語吳錫光係獲罪之員旣據該撫奏稱該革員頗得勇心見充前隊著准其從緩辦理仍飭羅玉斌派令帶勇剿賊如能奮勉出力卽據實保奏儘仍復不遵節制卽遵前旨以軍法從事此旨前旨均不准先行洩漏致令該革員心懷疑畏別生事端將此由六百里加緊諭令知之○陝西巡撫王慶雲奏餉絀兵飢請飭酌復舊例令

各路糧臺運儲糧石得旨所奏甚好足見謀國之誠其有未備及各就各省簡便之處著軍機大臣會同戶部速議具奏○和春等奏乘夜襲焚廬州賊巢斃賊多名得旨見在廬州之賊爲數無多果能四面齊攻俾應接不暇自可得手和春久歷戎行因何計不出此屢次觀汝等奏報未嘗不分路進攻然總未克復皆緣諸將勇怯不一未免先存觀望及至臨收隊時必趕至汝陣前以掩其畏葸汝則曰進攻某門未能得手試思汝又未見其直薄城下焉能必其不能得手號令不嚴故曠持若是也又奏進擊舒城賊壘獲勝派撥兵勇迅圖克復批音德布雖已抵舒猶恐兵力尙單務須乘勝勦洗不可稍鬆一步此次獲勝實足褫彼逆魄亦幸其無心戀戰也○予安徽殉節學政孫銘恩祭葬世職諡文節○乙亥信格林沁奏連鎮逆匪撲濠圖竄疊次殄斃多名並陳已革副都

統明慶愧奮出力得旨朕惟速盼捷音盡數殲除林逆若在連鎮斷不可任其潛逃明慶既屢次出力著開復原官○調全慶爲倉場侍郎轉瑞麟爲戶部左侍郎以熙麟爲戶部右侍郎

由內閣學士遷

○

丙子諭內閣兵部奏軍營保舉拔補人員查例請旨一摺嗣後各路帶兵大臣於軍營出力人員均著查照該部所奏定例分別辦理不得以各省所出之缺率請盡數咨送軍營升補以符舊制○諭軍機大臣等前據楊需奏三路進攻情形其居中一路擬派魁玉楊昌泗帶領前赴荊州官兵由襄河直下當經諭知官文照楊需所咨飭令前往並諭楊需迅速催提以爲東西兩路策應茲據官文奏雙保等督帶兵勇已於七月二十二日克復天門縣城沔陽州知州蕭蔭恩等亦於七月十五日將該州所屬仙桃鎮賊巢攻破已飭該鎮等速行前進聽候楊需調遣等語此卽楊需所籌

西路之兵既經沿途攻勦距漢陽僅止三百餘里卽著楊需催令迅速前進直取漢川與東路黃陂之師力圖夾擊毋任再延至楊需所籌中路之師見據官文奏螺山一帶賊船甚多儻南岸攻勦緊急北岸礮勇千餘名尙形單弱魁玉楊昌泗已飭由監利馳往螺山隨勦隨進再達武昌意在重防荆岳交界此時湖南水師甫經挫衄螺山地方上通荊州下接鄂省若必令魁玉等折赴襄河誠恐程途紆緩且難兼顧荊州果能與湖南兵勇沿江南北兩岸夾攻而下亦仍不失三路進攻原議著卽照官文所奏責令該革員等管帶兵勇與湖南水陸兵勇節節進逼毋任南北接壤之處稍有賊踪闌入楊需想已於日內進紮楊店卽著迅督東西兩路官兵分道迎勦至青磨原帶兵勇除魁玉等見在帶赴螺山四千三百名外其餘兵勇如楊需必須調赴襄河直入漢水仍著揀派

得力將弁徑往迎提管帶前進以資協剿其克復天門及攻剿仙桃鎮出力之官紳兵勇著官文會同楊需酌量保奏將此由六百里加緊各諭令知之○向榮奏查東壩爲蘇常門戶時防賊船內竄吳全美紅單船二十五隻於七月十二日至浦口江面屢催上駛無如經旬未遇順風仍泊原處查有各船隨帶之三板船小而易使密飭吳全美妥爲派撥並催浦口划船乘夜渡過夾江焚襲該逆水營臣另由陸路潛師接應兩次均有斬擒又恐紅單船少力薄面商琦善續撥挖罾船六隻前來助剿迄今未據報到二十三日副將福廣稟報有賊船七八百隻由蕪湖闖入內河已至高淳之小南湖勢將直犯東壩查該處防兵僅一千四百餘名臣當抽撥精銳兵勇二千人交署徐州鎮副將傅振邦率同遊擊蕭知音等管帶立時啟行馳往截剿復飛調鎮江官兵一千四百名由

常州宜興以趨東壩迎頭兜剿並咨督臣怡良撫臣吉爾杭阿趕

調上海兵勇二三千名守護蘇州省城仍相機由無錫宜興前來

會剿以防內竄並飛咨浙省一體防堵旋據探報該逆已竄越高

淳至固城一帶距東壩止十四五里福賡帶兵迎剿斬殺多人逆

眾退於湖口二十四日匪船復乘風颶至撲近我營福賡督率廣

東兵八百名上前奮擊斃匪百有餘人燒燬賊船二隻該逆愈集

愈眾四面圍撲自卯至未我兵力不能支福賡中礮陣亡餘兵潰

散聞信之下憤恨填膺隨派翼長福興會同已革提督鄧紹良統

帶兩廣兵勇一千六百人星夜馳往督剿旋接傳振邦稟稱該副

將於二十五日進駐東壩五里山梁該逆萬餘蠡擁來拒我軍施

放排槍立斃賊匪無數忽由後湖鈔出賊眾數千我軍分投迎剿

無不以一當十刀砍矛刺該逆紛紛倒地鏖戰許久殺賊不下五

六百人生擒新舊長髮賊五十餘名賊目四名斬獲首級五十餘顆奪獲槍礮旗械一百餘件餘逆四散避匿是夜卽進營毛公鋪二十六日分兵二隊先由下壩出其不意由後鈔擊該逆驚潰回奔其上壩賊黨亦被我兵前隊趕殺卽時擊沈五船餘皆開駛遠竄岸上潰匪復經我兵兩路夾攻斬擒甚眾餘逆俱向高淳竄走我軍追殺十餘里而止探聞逆匪尙在高淳聚集築壘空濠意圖久踞見一面責成傅振邦趕緊追剿仍飛飭福興督率諸軍併力追躡務將高淳一帶肅清臣仍催趙紅單挖督各船一遇順風進赴蕪湖等處江面與陸軍會合夾攻以期盡掃逆氛得旨覽奏情形甚爲喫緊幸有傅振邦之小勝或可暫遏兇鋒辦理尙合機宜以後福興等打仗情形速速馳奏○江甯將軍蘇布通阿奏收集駐防兵丁請准隨營打仗得旨見旣可成一隊又自請圖報朕甚

嘉憫若仍令其休息轉難慰我旗僕之心著准其隨營攻剿並著
蘇布通阿將此硃批明白宣諭○丁丑諭內閣欽差大臣琦善嘉
慶年間由部曹外任司道府歷封疆蒙 皇考宣宗成皇帝畀以
兼圻重任晉贊綸扉疊經獲咎旋即起用朕御極後因其在陝甘
總督任內辦理番務未能允洽加以嚴譴旋因粵匪肆擾特賞給
三品銜署理河南巡撫並授欽差大臣賞給都統銜督兵赴江北
一帶進剿該大臣自抵揚州軍營後屢獲勝仗賞戴花翎後因揚
州竄出賊匪未能嚴防截剿革去都統銜近日進攻瓜州賊巢復
命統領水師疊次獲勝一切調度均合機宜方冀其克復瓜州肅
清江面遽聞溘逝悼惜殊深琦善著追贈太子太保協辦大學士
兼賞總督銜卽照總督軍營病故例賜卹並准其入城治喪任內
一切處分悉予開復應得卹典該衙門察例具奏伊子員外郎恭

釗筆帖式恭鈞恭鏜百日孝滿後均著該旗帶領引見用副朕篤念蓋臣至意尋予祭葬諡文勤○諭軍機大臣等陳金綬等奏琦善因病出缺一摺已降旨授托明阿爲欽差大臣馳驛前往揚州督辦軍務矣托明阿未到任以前所有勦辦事宜暫著陳金綬權行代辦並諭令雷以誠仍在揚州隨同防勦見在瓜州賊匪負隅死守雖運河東岸有陳金綬穆克登額在彼紮營運河西岸有德興阿所統滿漢官兵三汊河一帶亦有參將安勇遊擊毛三元等專司駐守惟當此時軍無統屬逆賊得信必更肆其猖獗陳金綬勇敢雖著謀略不足非統帥之才且自焦山以上及浦口六合儀徵等處各路水師正當攻勦萬分喫緊之際托明阿接奉此旨後卽著星夜馳驛迅往揚州接辦到揚以後水陸各營均著節制此次就道毋庸多帶官兵行走致有稽遲托明阿經朕簡畀重任卽

當勉奏膚功悉心籌畫與陳金綬雷以誠等迅殄妖氛以慰廑念
至江防最爲扼要金陵鎮江皆與瓜州一水相通抵揚後尤當與
向榮等隨時咨商聯絡聲氣不可稍存意見諒該大臣必能計畫
周至爲朕分憂其連鎮之賊已被套隄圍困此時托明阿雖赴揚
州並未多帶官兵前往連鎮窮蹙之寇以鉅萬兵勇足敷勦辦僧
格林沁務卽督率將弁剋期殄滅埽穴擒渠斷不准任其潛逃爲
患朕惟速盼捷音早至該大臣亦當上體朕心也將此由六百里
加緊諭令知之○諭昨據向榮奏賊船由蕪湖江口竄擾東壩派
兵援剿一摺情形甚爲喫緊當批諭將福興等打仗情形速奏諒
福興等早已趕到必有續報又途東壩爲蘇杭門戶亟須嚴爲堵
扼副將傅振邦等所帶兵勇二千雖兩次獲勝而探聞逆黨甚多
必得飛催福興等合力進剿以期醜類肅清不至深入所稱趕調

上海兵勇二三千名守護蘇州等語上海正當勦賊喫緊之際兵勇能分調若干著吉爾杭阿統籌全局酌量辦理怡良見駐蘇州距東壩較遠著卽於常州無錫一帶擇要駐紮遏賊來路卽可固蘇省之藩籬並可爲福興等後路援應以壯聲威毋稍延誤前有人奏賊匪覬覦蘇常爲糧米所出擬由徽甯竄擾急宜防護且蘇省本年未經辦漕若年復一年浙之嘉湖近蘇諸郡勢必效尤請飭該督撫豫籌新漕事宜等語著怡良吉爾杭阿體察情形斟酌妥辦所有水陸軍營各事宜仍著向榮隨時咨商妥辦毋得稍分畛域致有貽誤將此由六百里加緊各諭令知之○諭陳金綬等奏琦善因病出缺一摺覽奏曷勝悼惜見在瓜州賊匪尙在負隅該逆知琦善病故勢必乘隙窺伺水陸防剿萬分緊要托明阿抵揚尙需時日所有欽差大臣關防著交陳金綬暫行接辦雷以誠

尙未啟程赴皖並著畱於軍營會同陳金綬將防勦事宜妥爲經理軍營一切文案翁同書卽可毋庸代拆代行前據邵燦奏由陸路赴皖與袁甲三會審案件著陳金綬等卽傳旨飭令該漕督行抵安徽後暫畱該省辦理勸捐防堵事宜雷以誠駐紮萬福橋距大營較遠自應與陳金綬同在一處和衷商榷更爲妥協其裏下河練勇及經手事件卽飭文煜趕緊接辦見在副都統德興阿帶滿漢官兵駐紮運河西岸托明阿未到以前卽責成陳金綬雷以誠及該副都統督飭水陸將弁相機進勦迅圖克復瓜州不得專待托明阿致延時日其浦口等處仍嚴飭武慶等實力防勦毋稍疏懈瓜州逆匪近日情形著陳金綬等隨時速奏將此由六百里加緊諭知陳金綬雷以誠並傳諭德興阿知之○命前任江甯將軍托明阿爲欽差大臣馳往江南揚州軍營督辦軍務○戊寅諭

軍機大臣等前據王慶雲奏各路糧臺運儲糧石一摺當交軍機大臣會同戶部速議具奏茲據恭親王奕訢等酌覈例案詳議覆奏見在賊氛未靖各路軍營需餉浩繁部庫籌撥銀兩實形支絀疊經降旨並由戶部奏明行知琦善向榮勝保等軍營運儲米石以充軍食湖北等省漕糧均准截畱接濟山東折漕因恐出入折耗令將米石撥營備用各屬倉社米穀均准關支僧格林沁軍營亦奏勸捐糧草可見銀糧兼支爲見時要務與其空言撥餉支領不能應時何如就近籌糧兵丁得需實惠著各路帶兵大臣及各該督撫等嚴飭糧臺承辦各員查照舊章征兵每名日支口糧米八合三勺月支鹽菜銀九錢並於出邊口之日加給鹽菜銀四錢凱旋進邊口之日卽行停止其各路防兵除隨時酌撤外其餘卽照舊例覈支毋庸加給銀四錢以示區別務須各就地方情形迅

運儲備糧石值此秋收之時籌辦較易爲力其有漕省分徵存未
運漕糧均准各該糧臺就地動用並碾動各屬倉穀其無漕省分
均令於所屬倉穀項下酌量開支仍將動用各項糧石數目分晰
報部以憑查覈至各處情形不同並著隨時體察或籌項採買或
勸諭捐輸或由鄰省轉運務卽通融籌辦各該大臣督撫等具有
天良當此軍餉支絀之時均應趕緊設法儲糧抵餉以濟急需毋
得徂於糧臺積習坐待撥款致有貽誤將此由五百里各諭令知
之○己卯諭軍機大臣等勝保等奏近日圍剿情形並力籌進攻
一招所稱宣洩積水鑄造大礮均不免過於迂緩其遣人內應一
節尤屬毫無把握此時總以四面齊攻立破州城將該逆就地殲
滅方爲上策若任其突竄再圖追襲雖勦辦較易仍恐別有蔓延
據奏飭令附近州縣刈割秋禾並將魏家灣船隻移撤下游均爲

豫防賊竄起見該大臣所籌多派馬兵分投扼路見在該逆尙未
竄出焉能必其經由何路徒分馬隊之力亦非良策崇恩見已回
營德勒克色楞善祿等均已四面嚴扼卽著勝保督飭各路兵勇
迅速環攻務將該逆就地剿滅如有竄出零匪卽著崇恩嚴飭各
該州縣汛兵練勇節節扼截以便馬隊跟蹤緊剿儻不豫籌布置
致該逆再有踞城抗拒之事朕惟該大臣等是問將此由六百里
加緊諭知勝保並諭德勒克色楞善祿崇恩知之○刑部奏審明
李黑子等冒充差役向車戶索詐錢文按例從重定擬得旨李黑
子著改發黑龍江給兵丁爲奴董得兒王年兒馬大崔二格均著
改發極邊足四千里充軍當此軍需緊要之際豈可稍有輕縱藉
端需索罪在不赦豈可尙分偶爾與否又斷云與實在棍徒屢次
生事無故擾害者有聞更不成話彼例云棍徒者係指不安本分

互相訛詐而言與此案之藉差役爲名毫不相涉胡不斷云假差嚇詐致被詐之人自盡斬候上減一等正與此案相符爾部爲刑名總匯平日堂司各官所講求者何事朕爲汝等愧極○庚辰諭內閣楊需奏先後克復京山等州縣城池一摺湖北京山縣城池被賊竄踞經安襄鄖荆道羅遵殿派委員弁會同該縣知縣杜嘉善督率紳勇進攻疊次殺斃賊匪千餘名擒獲長髮賊目等一百二十餘名於五月二十六日將縣城克復其竄踞孝感縣之賊經該縣知縣李殿華帶勇於楊店小河溪等處進剿先後獲勝二十六次擒斬賊匪一千六百餘名七月初九日夜間於河干縱火焚燒賊船數十隻賊眾驚潰隨將縣城收復四川松潘鎮總兵雙保因天門縣被匪竄擾奉檄往剿隨督同署參將常德等於七月十九等日與賊接仗四次焚燬賊船八十餘隻殺斃賊匪四千餘名

擒斬二百四十餘名餘匪溺水燒斃者無算二十二日將縣城攻克孝感縣知縣李殿華復會同甘肅遊擊孫學瀛在籍知縣喬綏福於七月二十三日將黃陂縣城攻克麻城縣踞城之賊經署黃州府知府許廣藻署麻城縣知縣賀棨黃岡縣知縣翁汝瀛督勇剿捕焚毀賊巢數十處遂進偃縣城賊眾於夜半竄出被擒斬一百餘名該縣城池隨即收復湖北被擾各州縣先經官文等奏報將沔陽州克復茲復據楊需奏報克復京山等縣荆襄附近地方漸可肅清其竄逸餘匪仍著楊需嚴飭各該地方官迅速拏捕毋畱餘孽甘肅瓜州營守備鐵振國迎剿不力著卽革職以示懲儆○向榮奏據副將傅振邦稟七月二十五日東壩之戰逆首羅大綱卽羅亞旺率眾竄走高淳東壩上下已無餘匪福興帶兵於二十八日馳抵高淳之毛公鋪探得逆匪趕築土城礮臺賊船均停

泊附近意圖占踞我兵由東北隅蘆蕩襲擊該逆驚駭卽棄土城奔避上船我兵趕殺斃賊百數十名燒燬賊船八九十隻餘船由丹陽湖向花津逸去該逆知我大營兵分力薄於三十日率黨四五千人分股由南路至七橋窺撲川兵捷勇營盤相隔小河槍礮互擊我軍潛從上流鳧水而過繞出賊後直前衝殺俘斬長髮二百餘人奪獲擡礮鳥槍一百餘桿刀矛旗幟多件閏七月初一日該逆突由洪武門出眾數千至河定橋上方橋一帶縱火來鈔七橋甕營江甯將軍蘇布通阿督同參將張國樑等堅壁不動伺賊氣懈分投縱擊該逆抵拒不退適參將蔡應龍守備馮子材帶領兵勇分左右鈔出刺中騎馬賊目一人賊眾驚駭始大奔潰追斬數百級賊復於初二日由洪武門通濟門雨花臺分出三股先撲七橋甕又於朝陽太平兩門出賊兩股從龍脖子左右撲下窺

我湖南營盤當經楚兵分隊出禦該逆見我人少兩面鈔來都司銜陶茂森首先衝入賊隊賊皆披靡時南韶兵亦趕到夾攻大加勦擊擒斬百有餘人該逆竄回龍脖子山梁伏匿不退意圖牽掣維時七橋翼各營該逆分股圍撲不下萬人蘇布通阿親扼橋口督戰張國樑率精銳數十人冒賊裝束突入賊中手刃逆匪數十人該逆莫辨真偽自相擊殺賊眾大亂時有另股賊匪縱火延燒高橋門一帶經蔡應龍領兵馳往要擊砍殺不少追奔數里復會合七橋翼各兵勇大加殲擒逆眾落水淹溺無算餘俱逃竄通濟門雨花臺而去是日之戰自卯至申我兵勇無不以一當百殺賊最多三日之中約計斃賊不下三千餘人割獲首級五百七十六顆髮辮耳記二百五件生擒三百五十六人內有偽丞相譚應桂訊明正法奪獲槍礮刀矛旗幟不計其數查點我軍兵勇稍有傷

亡其水師各船葉常春督駕挖習四隻與吳全美紅單各船會合駛至下關江面見賊礮臺礮隄層層遮護我船逼近轟擊先後毀去礮臺七座大小賊船一百餘隻復燒毀七里洲水營二座賊黨焚溺甚多並擊斃礮隄執旗賊目五人餘船悉數逃入夾江我船勦洗而上直抵三山營江面分扼駐泊初二日上游來船三百餘隻中有黃衣賊渠指揮迎敵吳全美先令五船沿北岸而上盡將賊船讓過橫截其後前面各師船見賊船已近始將大礮齊發紅單水師各船礮位環布運掉如飛各水手又能躍入波濤跳上賊船該逆驚駭進退無路遂紛紛投江自溺無一得脫者奪獲大小船二百六十餘隻生擒賊匪二百餘人凡江上所遇賊船一掃而空訊據賊供逆首秦曰綱中礮落水其餘陳繼書余幅泉等僞官多人亦皆擊斃惟尚有賊船一百餘號避匿口內不敢出江見檄

福興挑選兵勇另乘小船入湖務期剿滅淨盡臣查我軍以少擊眾三戰三捷又經師船痛剿使上游賊援一斷卽陸路亦易得手所有此次水陸出力員弁懇請旨准擇尤保奏再查鎮江賊匪被剿情急經余萬清設法解散逃出頗多四面布置情形亦俱周妥並據報七月二十七日及本月初二日出隊攻城均有斬獲上諭軍機大臣等向榮奏東壩肅清高渚克復並金陵水陸大獲勝仗一摺覽奏稍慰朕懷此次陸路殺賊不下三千餘人水師亦將賊船沈燬殆盡並擊斃逆首秦曰綱一名該逆彼猖已久經此大創洵足以寒賊膽而振軍威粵東紅單船本係得力舟師一經調度合宜卽可指揮如意所稱上游賊援一斷卽陸路亦易得手此是一定之理向榮正可乘此聲威督率吳全美等統帶師船迎賊所向往來剿洗一面親督陸路兵勇合力圍攻迅圖克復堅城殲

挫首惡爲次第肅清江面之計所有避匿高瀟湖口賊船尙有一百餘號仍著嚴飭福興所挑水師兵勇竭力接捕悉數掃除免致另圖滋蔓仍須督飭該處派防將弁嚴扼逆眾乘虛回竄之路至余萬清剿辦鎮江賊匪日久無功前經降旨飭查原恐其不能得力究竟該革員於防剿事宜能否獨當一面著向榮隨時察看據實具奏毋得稍涉瞻徇自干重咎將此由六百里加緊諭令知之尋奏余萬清抵鎮江統兵以後尙屬愧奮出力報聞○諭前因楊需軍營兵餉不敷諭令官文將川餉截留二三成外餘銀悉解襄陽應用本日據楊需奏接到官文來咨僅撥銀二萬兩並稱前解省城之項仍留作遣發武昌兵勇之用等語見在楊需軍營需餉甚急較荊州更爲喫緊武昌兵勇業經駱秉章資給銀米無須多爲留備該將軍截留川餉竟至十五萬之多實屬不知緩急著官

文卽按照楊需所咨如數迅速籌撥解往該署督軍營毋得稍有推諉嗣後各路解餉過荆斷不准截畱過多專顧一隅置大局於不問至官文前奏螺山緊要派令魁玉等前往協剿茲據楊需奏此項兵勇畱荆則中路無兵可派而吳振鏞等所帶兵勇復經官文改派則西路亦形單薄著官文迅飭楊昌泗將原帶兵勇全赴襄陽勿稍延緩魁玉著管帶所收武昌兵勇一千六百名畱在荊州應往何處防堵並著官文妥爲調遣其張于銘吳振鏞鍾圻分帶之練勇均令悉照原議不可再有更動參將王國才著官文卽飭該員馳赴楊需行營以資差委總之此時攻剿緊急軍營號令須歸畫一若因彼此意見不同紛紛更調必致將弁無所適從所有進剿機宜均著統歸楊需妥籌布置該將軍如有必須參酌之處卽與楊需熟商籌辦不得稍分畛域將此由六百里加緊諭令

知之○諭楊需奏克復京山等州縣並調荊州官兵軍餉及請飭江西派兵出剿各摺片見在京山等州縣均已收復惟漢川尙爲賊踞江北大局已粗有頭緒亟應乘勢進攻豈可坐令兵單餉絀致成株待楊需中路舟師由襄陽直達漢水原爲東西兩路聲援嗣因官文奏螺山緊要恐魁玉等折赴襄陽轉形紆緩是以准其所奏令魁玉等沿北岸夾擊而徑出大江即可收漢陽之正面今據楊需奏此項官兵全畱荊州則中路無兵可派而吳振鏞鍾埈等所帶兵勇業經官文改派則西路之師亦形單薄所籌均係實在情形著楊需卽飛咨官文速飭楊昌泗將原帶兵勇全數帶赴襄陽毋得再有推諉其魁玉一員卽著管帶荊州所收餘兵一千六百名畱荊州交官文調遣張于銘由鍾祥赴漢川之勇吳振鏞等由朱河赴沔陽之兵鍾埈由沔陽赴漢陽之練丁均著悉照原

議分路進剿不可再有更調當此軍務喫緊之時若號令不能畫一將弁無所適從必致貽誤大局此後楊需應如何調遣之處卽著一面奏聞一面迅速布置不得因意見稍歧徒延時日所需荊州截餉卽著咨明官文如數籌解儻有藉詞推卸卽行據實具奏參將王國才亦著迅調赴營以資差委至襄陽防兵需餉前已疊諭王慶雲籌辦第該省供給皖楚軍餉爲數不少此時司庫亦頗形支絀山西情形除撥各路軍餉外並須兼顧京餉卽能酌量撥解亦恐未可深恃著楊需將所需銀數咨商各該撫酌辦仍飭該地方官設法勸捐接濟不論銀米但期足敷兵食較勝遠道轉輸襄陽爲完善之區見又爲司道大員駐紮處所勸辦當易爲力安陸等處餘匪仍著趕緊按捕務使一律肅清楊需亦不得因此零星遺孽坐受牽掣致誤克復機宜也將此由六百里加緊諭令知

之○駱秉章塔齊布曾國藩奏七月二十一日臣塔齊布親督陸營進剿行近城陵磯遙見該逆築有土城都司諸殿元拋擲火罐延燒賊壘帳棚逆賊敗竄正在跟追詎湖汊伏匪齊出諸殿元兵力太單力戰陣亡劉士豈同時被害臣塔齊布揮軍往救斃賊多名轉敗爲勝二十六日該逆悉銳來撲羅澤南等大呼衝突直趨高嶺陣斬僞國宗石姓賊始大潰其分撲鳳凰山大營者數以萬計臣塔齊布親督將弁槍礮齊施斃賊一二百名賊分路鈔襲我軍亦分路迎敵無不以一當百約斃賊六百餘名適羅澤南等追至會合併攻又斃賊數十名賊被追過河溺斃不計其數二十八日臣塔齊布直擣高橋賊壘連斃數賊正衝突間大股續至適羅澤南湘勇繞鈔賊尾該逆後路受敵立即大潰周鳳山等併力齊攻賊始敗退歸巢計共斃賊二百餘名生擒十餘名奪獲軍械旗

賊馬羸無算二十九日賊分數股來撲我軍先燒附近民房臣塔齊布揮兵迎擊將中路之匪擊退其左右兩股亦經周鳳山羅澤南等殲斃無數其別隊千餘人亦經李續賓等橫截分鈔槍斃賊目二名墜嶺死者不可勝計共殺賊五百餘名臣國藩以賊勢全注陸路其水路必虛密令各水軍乘隙進剿楊載福等於是日率船進攻道員李孟羣亦派戰船策應行近城陵磯見逆船十餘往來馳突我軍見船卽擊一擁而前燒毀數隻賊皆墜水東岸追至擂鼓臺西岸追至荆河腦忽伏匪兩岸擁出希圖鈔尾我軍愈奮轟擊無遺把總秦國祿等深入賊巢賊遂大潰有此數次大戰岳州可保無虞上諭駱秉章等奏水陸官軍四獲勝仗正可乘此聲威直擣武漢著塔齊布曾國藩將城陵磯餘匪迅速剿除淨盡卽日整師東下毋再延誤本日據楊需奏京山孝感等州縣先後

收復見已派令佈克慎台湧帶兵出雙廟進剿並令雙保福斡等由天門進取漢川魁玉楊昌泗等由襄陽水路進趨漢口該署督亦卽日統師前進此時南北兩路辦理均屬得手並經官文等奏報已添撥兵勇派同知銜李光榮等統帶由調弦口協剿當此官兵雲集應如何聯絡聲勢分投進逼之處並著塔齊布等與楊需官文函商妥辦無失事機至前諭塔齊布陸路官軍能否由通城崇陽一帶直攻武昌之背並著悉心籌畫隨時奏報塔齊布曾國藩自帶兵以來既未嘗遇敗而怯定不至乘勝而驕總宜於安速之中持以慎重則楚省賊蹤漸可埽蕩岳郡地屬緊要前諭駱秉章飭令胡林翼督帶練勇前往嚴防該撫定已遵辦仍著將臬司於何日抵岳如何設防之處迅速馳奏將此由六百里加緊各諭令知之○僧格林沁奏賊匪鳧水思遁迎剿續獲勝仗得旨逆匪

實已窮蹙指日定可殲除猶不可稍涉大意致令竄延僧格林沁晝夜艱辛朕甚廑念著傳諭眾將士迅速成功同膺懋賞○壬午諭軍機大臣等有人奏河北銅山豐沛間有新起土匪頭目張彥李大選杜四杜五等聚眾千餘在水路擄掠爲患見在江南徐州一帶正值防堵喫緊之時豈容此等匪徒嘯聚貽害地方若不乘其初起卽行掩捕將來蔓延日甚更恐與逆匪暗相勾結著怡良吉爾杭阿楊以增崇恩嚴飭該地方文武並酌派兵丁會同嚴密查拏該二省交界處所務當不分畛域一體拏辦俾絕根株毋任一名漏網將此由四百里各諭令知之○乙酉諭內閣惠親王等奏本年王公大臣秋俸請變通抵放一摺著依議行惠親王應領俸銀前經奏請俟軍務告竣再行支領所有本年秋季俸銀著加恩賞給一半○諭軍機大臣等勝保等奏逼近賊巢紮營建築礮

臺力籌剿辦一摺逆匪占踞高唐幾及四月早應移營逼近賊巢用礮攻擊該大臣業經迂緩於前以致日久尙無把握此時惟有督率兵勇合力進攻迅圖克復仍當設法揀選精銳一鼓登城不得專恃礮轟別無善策儻該逆窮極思竄即可乘勢殲除斷不准再令蔓延擾害他處該大臣所帶兵勇爲數不少果能明攻暗襲何至叢爾孤城尙藉口於步隊之不能抽撥所有西南兩面並著趕緊逼近環攻以期盡殲醜類若再曠日持久勞師糜餉之罪豈能屢邀寬宥耶將此由六百里加緊諭知勝保並諭德勒克色楞善祿崇恩知之○予山東殉節知縣朱運昌等祭葬世職建祠○丙戌諭軍機大臣等前因翰林院侍講清安奏大錢未能暢行諭令步軍統領衙門順天府五城妥籌辦理本日據周祖培奏大錢壅滯之故由於使用私錢者未奉明禁以致官錢任意折算奸商

官私並用壟斷出入故小民疾苦日甚請於嚴拏私鑄私販人犯外明定章程禁絕使用私錢以杜銷售之路各部院及旗營給發公費兵餉均有蠹吏奸役私行抵換官錢等弊尤爲官私混雜之害並請嚴拏究辦各等語著步軍統領衙門順天府五城按照所奏悉心妥議奏明辦理並嚴拏私鑄私販不得任其肆行無忌阻撓園法原摺著鈔給閱看將此諭令知之○諭有人奏河南固始光州一帶捻匪數萬人立旗幟造偽號以李士林爲盟主任純學爲謀主丁心田易天幅李瀾起劉結大四人爲東西南北四路僞元帥並有著名捻首張全義朱鳴義等多人見充光州息縣總役該州趙登峻該縣陳棠貪聲素著反倚該役等爲腹心以致捻匪聚黨日多竟敢焚燬期思鎮馬岡集谷堆集等處並率眾數萬於二月間攻固始五月間攻商城已革南陽鎮總兵柏山擁軍坐視

畏葸不前僅有固始縣知縣蒯賀孫殲辦擒匪尙有膽識反爲趙
登駿等所排擠等語河南等處民風强悍平時結擒械鬪地方官
卽應嚴拏懲辦況見在偏近賊氛更應肅清內匪以防勾結若如
所奏地方官縱賊殃民固屬罪不容誅英桂統轄全省亦豈能辭
咎著卽趕緊嚴飭所屬文武員弁協力勦辦立將李士林等首夥
各犯悉數擒拏盡法懲治毋令竄逸並查明柏山如何玩誤及趙
登駿陳棠棠賊情形從嚴參辦以靖地方再商邱縣知縣宋錫慶
在籍給事中陳壇前因商邱失守同時逃避曾經降旨令該撫查
拏嚴辦迄今將及一年未據覆奏殊屬不成事體著卽迅速查辦
毋再遲延干咎原摺著鈔給閱看將此由五百里諭令知之○諭
陳啟邁奏逆船竄擾吳城建昌一摺並賊撲武甯戕害大員等語
七月十七日賊船上竄將抵吳城鎮兵勇退守上游十九日復有

賊船三四百號由渚溪駛入建昌縣界之山下渡距省均止百餘里該撫見飭革員趙如勝酌帶戰船水勇駛往下游並飭吳錫光等由山下渡陸路追擊是否足資截剿本日已諭令駱秉章酌調官兵並派員管帶馳往協剿惟鄰省調撥尙需時日誠恐緩不濟急而羅玉斌攻剿九江以分賊勢亦斷難撤回此時省城情形萬分喫緊必須司道大員帶兵出省相機堵截未可專待外援任其倡獗臬司惲光宸前曾帶兵出省並未馳赴武甯見在賊氛逼近若仍株守省垣專恃趙如勝等帶兵剿辦勢必貽誤事機著陳啟邁卽於司道中遴派得力之員統兵前往扼要駐紮爲迎頭截擊之計其由興國州竄撲武甯之賊眾至二萬該縣甫經收復城內弁兵不過千餘不敷堵剿並著該撫嚴飭署鹽道王訓迅速帶兵馳往剿辦毋稍延誤江西與鄂省毗連處所甚多若楊儒等進兵

攻剿前後夾擊更恐逆匪乘隙竄擾江西是內患未靖又須堵禦外來賊黨儻防剿稍疏勢必滋蔓難圖著該撫嚴飭帶兵文武員弁防剿兼籌不得稍涉大意並將逆匪情形隨時馳奏陣亡之遊擊富克金泰等著查明請卹將此由六百里加緊諭令知之○諭據陳啟邁奏逆船竄擾吳城建昌逼近省城兵力不敷調遣請飭湖南仍令上年來江助剿之官紳朱孫詒羅澤南等管帶兵勇前來協剿等語江西賊勢猖獗省垣兵力單薄急需鄰省分兵援救著駱秉章迅卽選派精兵三四千名馳赴江西以資接濟惟見在朱孫詒羅澤南皆帶兵勇隨同剿賊甚爲得力該二員能否派往著該撫酌量緩急妥籌辦理如實在不能分撥卽著另揀得力員弁管帶所挑官兵迅速馳往江西協剿毋稍遲緩致誤事機將此由六百里加緊諭令知之○丁亥諭內閣戶部等衙門奏遵議通

政使李道生條陳錢法一摺戶工等局鼓鑄當百當五十等項大錢子母相權便民利用近因奸商阻撓以致大錢不能流通業經刑部定擬罪名由各該衙門剴切曉諭俾共知此項當百以下大錢永遠通行決無更改愚民不至妄生疑慮奸商亦不敢任意阻撓以身試法其私鑄大錢人犯仍著步軍統帶衙門順天府五城一體嚴拏照新定章程治罪○諭軍機大臣等易棠奏遵議新疆變通事宜一摺據稱馬廠及歇穡之地均可開墾其不便屯兵之處可募民回墾種並招內地民人准其攜帶眷屬藉資開墾其兵制之可裁者如伊犁烏嚕木齊屯田可召民回承種屯兵即可撤令歸伍其南路各城換防官兵若改爲眷兵則烏嚕木齊議添之兵可無須調往又各該處駝馬等既經變賣則經牧官兵亦可入伍各等語所奏俱係因時制宜爲籌畫經費起見惟口外情形究

非該督所能深悉著奕山圖伽布常清春熙廣福按照所奏各條
察看地方情形悉心斟酌妥速籌議據實奏辦總期通籌全局節
省餉需仍於邊防無損方爲善策毋得畏難推諉徒以一奏塞責
原摺著鈔給閱看將此各諭令知之尋伊犁將軍奕山等奏伊犁
土性寒薄難以開墾下軍機大臣戶部會議尋議奏伊犁開墾之
案阿桂關之於前松筠成之於後事在必行以期地利無遺蒙古
牧廠及官兵馬廠自應於水草茂盛之處廣爲踏看分別撤屯但
使可以省餉不必盡撤其人屯兵內有情願種地者卽給與佃地
而開其屯兵糧缺並於存營兵內添派換防抵減內地調撥經牧
兵丁亦如之不必遽有裁兵之名而已漸收節費之效以後停補
減抽實於經費有益從之○向榮奏師船自初二日獲勝後扼紮
三山營江面初四日東北風作下游大船三四十隻順風直上其

後隨有賊船一百六十餘號連檣齊進吳全美等各督紅單舵管分作兩隊散布江面左右讓出中流逆船風猛舟輕直前衝上被我船用礮兩旁轟擊紛紛碎沈其時大隊賊船分股鈔近我船折戣迎敵往來一時之久我船漸出賊船之後乃從上風齊發火箭大礮連環轟擊賊船相繼火起立時擊碎七八十隻轟斃焚溺無算餘船各向江邊逃逸復經水勇追赴南北兩岸殺賊一百餘人生擒六十餘人奪獲賊船五十二隻下關賊船約有五六百隻礮火極多另有一百五十餘船派來接應旋見賊船大幫從下游揚帆擁上直撲我船葉常春帶領舵管四船當先迎擊立時擊沈二十餘隻復會合吳全美紅單各船戣駛下游兜轉過上風將逆船圍逼江心衝盪勦洗逆黨紛紛撲水我船又四面縱放火箭火彈燒毀擊沈不下百船斃賊不計其數又據江浦縣稟報所有逃

逸北岸之賊經該處勇練截殺多人至金陵陸路之逆忽將城北之神策金川兩門撬開復於西南隅之善橋一帶紮營四出擄掠而大營兵勇分撥愈單未遑遠襲查有福興一軍已由高淳至小丹陽茲復調回大營並飛催鎮江派防東壩之兵勇一千一百名前來協剿太平小丹陽鎮一路先派傅振邦統帶兵勇九百名進剿見又派參將張國樑管帶捷勇四百名湖南精兵二百名由秣陵關一帶接應後路兼防善橋之賊連日探聞太平賊船多有闌入丹陽湖內者臣慮其折竄高淳札飭鄧紹良督率所帶官兵會同上海派來東壩之兵勇七百餘名嚴密防堵惟上游賊船沿江林立因屢被痛剿已趕調皖楚賊黨勢必大幫駛回吳全美及葉常春各船共止三十一隻雖疊獲大勝究不免有眾寡之殊所有廣東續調碣石之拖風紅單船四十隻久無到江消息焦灼萬分

因思上游肅清下游賊援自絕此時我軍下游戰船尚有八九十隻經臣函致翁同書商撥陳國泰之紅單船十隻或十五隻添赴上游協助並嚴飭江北各營與水師各鎮一體嚴密防剿不可稍涉疏虞上諭逆匪自高淳敗竄後疊經水師軍船大加懲創江路賊援自可逐漸斷絕而太平賊船近復闖入丹陽湖內其窺伺東壩之心尙未竟絕見在福興一軍已經調回金陵其鎮江派防東壩兵勇亦經前赴大營協剿東壩防兵僅有鄧紹良及上海派往之兵勇約二千名小丹陽鎮一路僅有傅振邦及張國樑所帶兵勇一千五百餘名誠恐不敷堵剿怡良前奏親督兵勇赴無錫常州一帶仍著速行前進不得因高淳賊已敗退又復中止向榮指調之上海軍營總兵虎嵩林亦著吉爾杭阿速飭該員前往怡良軍營協同進剿如該逆不敢再竄高淳亦可迎賊所向沿途探

勦此時江面水師正當得手之際若陸路官兵能繞出太平一帶鈔賊後路夾攻更易爲力至向榮所稱上游紅單挖罾等船究嫌單薄等語亦係實在情形逆賊既經屢敗其糾合皖楚逆黨大幫回駛固在意計之中且湖南賊船經我兵勇大加焚毀已追至嘉魚境內儻武漢一經收復該逆潰竄下駛上游師船實當其衝下游戰船既有八九十隻分調十餘隻不至遽形短少著向榮卽知會陳金綬等如北岸無須多船卽飭陳國泰將所帶紅單船分撥十隻或十五隻迅赴上游協同攻勦不得稍存畛域藉詞措畱將此由六百里加緊各諭令知之○塔齊布曾國藩奏閏七月初一日升用道李孟羣親督戰船出隊至城陵磯下游擊敗賊匪初二日臣塔齊布傳令進勦羅澤南李續賓等分路並進立抵高橋燒燬賊營七座擒斬數十人餘匪奔城陵磯一帶臣塔齊布帶同李

續賓等直赴城陵磯該逆出隊二萬餘人開礮互擊我軍伏地前進臣塔齊布策馬首先衝入潮勇繼之各兵勇一擁而前適大雨如注賊礮不然我軍乘勢猛撲羅澤南周鳳山等分投合擊踰溝越牆頃刻間屍橫徧地殲斃長髮老賊及賊目多名一營既破其五營亦同時踏平該逆自相踐踏我軍四路趨殺追至江岸偏溺者不計其數共踏毀賊營十三座殲斃約二千名生擒一百二十餘名逃散者又數十名臣國藩當飭李孟羣水軍三營追剿該逆先開所擄民船而以戰船拒後楊載福蕭捷三等從東西兩岸鈔擊李孟羣從中路進攻該逆驚竄時已昏黑我兵暫泊擂鼓臺下初三日分投進剿先從荊河口泝流而入復於東岸之旋湖港西岸之觀音洲等處搜擒賊匪四十餘名踏平賊營九座礮臺三座初四日楊載福蕭捷三等追至倒口石頭關等處疊有擒獲復追

至六溪口勦洗無遺見在臣國藩進紮監利縣屬之羅山臣塔齊布亦卽日拔營前進一面飛咨官文多派兵勇從大江西岸直下協勦並咨會楊霈由德安一路進攻漢口之背以圖克復鄂省掃蕩逆氛所有尤爲出力之文武員弁仰懇恩施量予獎勵又奏按察使胡林翼膽識絕人威望夙著所帶黔勇六百餘人前在貴州黎平府任內敎練有素屢著戰功本年勦辦崇通股匪安化土匪及收復常德郡城所至皆愜民望見奉諭旨仍畱湖南軍營辦理防勦事務請飭該臬司管帶黔勇酌撥他路兵勇自成一隊隨同臣等東征於大局必能有濟又接陳啟邁咨稱逆賊竄擾江西亟待南省應援請仍飭上年援江之委員朱孫詒羅澤南帶兵前來查朱孫詒見署寶慶府事能否帶兵赴援應由撫臣酌覈至羅澤南見帶湘勇一千與臣塔齊布聯營協勦屢次大捷見已進紮羅

山正當勦辦喫緊之際請免其赴援江省以便併力規復武漢
上諭見在塔齊布曾國藩自岳州城陵磯以下沿江追擊將二百
餘里賊巢勦洗殆盡已追至嘉魚縣屬後起大隊官兵亦即日跟
蹤前進是楚南一軍愈逼愈緊漸可駛抵武昌楊需儻仍株守德
安不卽統兵前往必致東下之師又成孤軍無援之勢於攻克武
昌全局仍無裨益著楊需卽照前奏三路進兵之議迅飭領兵各
員分道進攻總以星速出江爲要一面親率精銳由楊店進發直
趨漢口會督各路兵勇與塔齊布曾國藩所統各軍協同攻勦乘
此聲勢上下夾擊自無難一鼓殲除楊需與塔齊布等一經會合
兵力更厚或先克武昌或併攻漢陽惟在隨時審察軍情相機速
辦仍須四面兼顧不至該逆被勦窮蹙復有乘虛奔突之患此時
攻勦喫緊楊需斷不可再事耽延塔齊布曾國藩亦應倍加慎重

總期計出萬全肅清江漢毋負委任臬司胡林翼帶勇勦賊尙稱
得力著卽隨同塔齊布等前往湖北毋庸畱於岳州知府羅澤南
本係隨營協勦之員亦著毋庸派赴江西所有岳州善後防堵事
宜卽飭駐紮該郡辦理糧臺之藩司夏廷樾妥爲籌辦將此由六
百里加緊各諭令知之○以攻勦湖南城陵磯賊匪獲勝予湖南
提督塔齊布優敘賞已革禮部侍郎曾國藩三品頂帶○以福建
克復永安尤溪大田沙縣等城賞遊擊沙肇修等藍翎餘升敘加
銜有差○河南巡撫英桂奏據光州知州轉據代理商城縣知縣
劉宗岱在籍紳士周祖頤稟擒首李兆受等經官兵勦拏潛回霍
邱勾結匪黨二千餘人於六月十七日直抵商城圍攻兩日夜經
該縣劉宗岱會同營汛兵弁登陴守禦周祖頤督率團首陳長湖
羅必興等施放槍礮擊斃擒匪三四百人槍斃擒首馬四馬五二

名經臣派兵馳救該匪始行敗退見在該匪復糾餘黨於該縣之東南鄉嘯聚經團首陳長湖等殺斃百餘人適固始縣蒯賀孫及都司沙春元並六品軍功張曜等各帶兵勇追至斃匪一千餘人生擒二十餘名奪獲器械二百餘件餘匪四散連夜追至葉家集將該匪巢穴焚燒查此次官紳文武力保危城在事人等均屬著有微勞應請擇尤保奏以昭激勸得旨所有出力之員并紳董著准其擇尤保奏不准過多○戊子諭軍機大臣等有人奏蘇省徵收漕糧短絀請飭查整頓一摺蘇省漕糧之重甲於天下近來日形短絀雖因被兵被災民力拮据亦由地方官辦理不善所致據稱上年冬業田之家佃戶抗不交租地方官概不追比以致業戶完糧無從設措等語鄉民糾眾抗糧法所難宥該地方官自應痛加懲辦勿稍姑息至於佃欠業租既經該業戶控告亦應照例懲

辦以儆刁風總期於漕糧無誤方足以資整頓前年倪良燿辦漕不善業經革職而上年海運止解白糧貽誤更甚似此年復一年伊於胡底著怡良吉爾杭阿先事豫籌今歲新漕勿致再蹈前轍將此由四百里諭令知之○己丑諭軍機大臣等福濟奏逆匪窺伺徽甯飭屬嚴防並由浙省派兵堵禦一摺逆匪因江面舟師截擊輒入南岸竄至青陽漸入涇縣民團得力復欲改由太平竄入徽甯二郡窺伺蘇杭儻有疏虞實關東南大局和春福濟見在攻勦廬州遠在江北不能分兵勦辦自係實在情形據奏黃宗漢已派杭州府知府徐榮等分赴徽甯並派兵勇二千名隨往防勦是該撫深知保徽卽以保浙故能不分畛域布置周詳且該二郡有山谿之險得此兵力自可阻遏兇鋒至福濟奏稱南岸之貴池銅陵繁昌蕪湖等縣皆爲逆賊出沒之地浙江所派防勦之兵如能

追賊出江宜擇緊要如蕪湖大通等處就近駐紮毋遠回浙等語
黃宗漢向來辦事認真著卽統籌全局該省兵力能否外援鄰封
內保本境斟酌辦理至太平甯國與金陵接壤並著向榮怡良吉
爾杭阿體察見在情形酌籌防剿以期聲勢聯絡互相援應俾該
逆不能乘虛竄擾將此由六百里加緊各諭令知之○諭楊需奏
督兵進剿變通調遣一摺並招安投誠各等語見在塔齊布曾國
藩業已督兵進駐羅山該署督旣於十八日移營前進著卽遵前
旨迅由楊店直趨漢口會合湖南得勝之師乘此聲威盡殲羣醜
不得稍有耽延致失機會並飛咨魁玉等統帶兵勇卽行前進或
由沔陽直攻漢陽或隨同塔齊布等徑攻武昌毋許遷延觀望有
誤事機逆匪自踞武漢以來未經大受懲創此次官兵前後夾擊
該逆必四處奔竄以圖牽掣我軍分我兵力該署督務當統籌全

局杜其分竄爲次第克復武漢之計斷勿令此勦彼竄爲害他處也至從逆匪徒旣已悔罪投誠原可予以自新之路惟須察其眞僞暗相鈐制庶不至中其奸謀所有投誠之蔣昌梧李士林等二名卽飭遊擊吳登鼈知縣李殿華等加意防範如果不遵約束未能得力卽不動聲色嚴密懲辦若能帶領壯勇殺賊立功亦可寬其既往酌量保奏惟在駕馭得宜自可獲效該署督諒能妥籌辦理也將此由六百里加緊諭令知之○予江南揚州殉節鹽大使武林等祭葬世職安徽桐城殉節在籍員外郎馬元瑞祭葬世職建祠○撥戶部銀八萬兩解赴直隸連鎮軍營○辛卯諭內閣上年賊擾揚州府城失陷當降旨將督辦防堵之漕運總督楊殿邦等及失守地方之鹽運使劉良駒等革職分別治罪旋經琦善福濟雷以誠各將該革員等奏請畱營亦經先後允准昨據雷以誠

奏已革揚州府知府張廷瑞已革江都縣知縣陸武曾均因剿匪出力請分別免罪減等並畱營效力業經降旨允行惟該革員等失守城池罪名綦重僅予發遣已屬從寬若皆藉端保舉必致紛紛瀆請濫開僥倖之門且閔怡良昨奏揚州失陷之時候補微員尚有全家殉難者而該革員等或身爲大吏或責在守土轉得偷息行閒冀邀寬典何以慰死節而勵人心除陸武曾罪名經刑部議准減等改發新疆外其張廷瑞罪名亦著減等改發軍臺效力贖罪著楊以增卽行派員將該二員迅速押解啟程毋再延玩至楊殿邦見有應賠提用淮北鹽課銀著福濟飭令速行完繳如未能繳齊卽行具奏遵旨發遣不得以籌措賠項爲詞致滋延宕其但明倫劉良駒及此案內應行發遣各革員著一併迅速起解毋許逗畱並將起解日期卽行具奏○諭諄齡奏達賴喇嘛額請選

派傳經正副師傅祈爲代奏請旨一摺著照所請噶爾丹赤巴羅
卜藏清饒旺曲著爲達賴喇嘛正師傅溫結色呼圖克圖阿旺羅
卜桑托克邁丹澤恩禧木錯著爲達賴喇嘛副師傅○諭軍機大
臣等前據怡良覆奏袁甲三請將淮北滯銷鹽引籌運濟餉一摺
當交戶部覈議具奏茲據奏稱請令楊以增會同怡良袁甲三查
明酌辦等語此項淮北滯銷鹽引已逾奏銷尚未議定銷售章程
若再令會議酌辦往返咨商徒延時日於課款仍無裨益怡良既
稱暫停代納淮南懸引一款可以維繫新綱又無害於鹺局自必
確有把握卽著該督會同楊以增督同署運司設法辦理袁甲三
著毋庸會辦怡良職司鹺務責無旁貸楊以增近在淮北稽查較
便務當遴委賢員實力督銷不得以商疲引滯藉口致課款再有
短絀將此諭令知之○諭王慶雲奏提督營盤燒失餉銀坐扣兵

糧作抵造冊捏銷據實參奏一摺據稱固原提督桂明督帶防兵
出省迎剿由陝西省籌解餉銀五萬兩其第一次解銀三萬兩派
委候補從九品沈恬管解赴營於三月十三日據該提督咨稱此
項餉銀業已解到旋於四月二十六日又據咨稱被劫遺失復於
七月初五日咨稱餉銀行抵臨清於移營之時被逆賊燒毀營盤
查點餉車銀匣俱無遂將遺失銀兩按五十五日支放官兵口糧
鹽菜馬乾等項坐扣捏造銷冊咨請報銷嗣後沈恬供稱營盤被
燒失餉之後該提督諭令隱匿捏報土匪劫掠等語前後情節不
符覽奏深堪駭異見在桂明在楚隨同剿匪所帶員弁兵丁均已
赴楚著楊需按照所參各情就近提集應訊人證確切查明據實
具奏毋稍徇隱王慶雲原摺桂明咨文沈恬親供均著鈔給閱看
將此由五百里諭令知之○諭王慶雲奏設法籌餉各摺片自軍

興以來各路兵餉浩繁計已撥解數千萬兩見在部庫益形支絀而各省應徵地丁漕糧鹽關各項亦多不能徵解足額其被兵省分更屬竭蹶不遑以致東南富庶之區財源日竭指撥無從該撫自必深悉陝省土風淳樸節次捐貲報效具徵急公好義之忱與其捐自中人家集腋無多不如捐自素封之戶指困較易王慶雲平時辦事甚屬認真見既據稱回籍省親之宗人府府丞梁瀚素協鄉評著該撫卽行督率梁瀚會同在籍紳士王篤等體察情形各於素稱饒裕之家切實勸導如能自一萬捐自數萬十數萬者隨時按照銀數立卽奏請獎勵儻有不願請獎者並著王慶雲飭令藩司按數給予借貸印票分年給還作正開銷仍按照銀數多寡分別建坊給扁以示優獎總期湊集成數無論捐款借款先以百萬兩爲準以後如能源源接濟更爲妥善斷不准假手地方

官吏致啟抑勒侵吞之弊如有藉端影射及騷擾需索以多報少各情事准該紳民等呈告治以應得之罪將此由四百里諭令知之○壬辰諭軍機大臣等有人奏廣東省城土匪滋擾請飭防剿一摺據稱潮州府屬之惠來縣於五月十七日失守知縣殉難廣州府屬之東莞縣因該縣派差勒索船規致匪徒聚眾於五月二十二日攻破縣城知縣逃避都司兵丁等被害該匪竄至佛山鎮放火搶掠六月十七日直撲省城南門繞赴北門並番禺縣屬之石壁石井地方尚有會匪數萬樹旗招夥欲攻省城等語該督撫等於五月二十四日奏報剿辦潮陽匪徒獲勝摺內但稱毗連之普甯惠來等縣在在堪虞而於惠來東莞失守情形迄今三月之久未據奏報豈竟毫無聞見卽省垣被撲將該匪擊退而事勢危急亦未據該督撫奏到著葉名琛柏貴按照所奏各情節迅速具

奏並督飭文武員弁趕緊將惠來東莞各縣城剋期收復嚴拏土匪務期淨盡至省城見在人情是否安靜籌捐募勇足補兵力之不及該督撫尤當認真督率紳耆妥籌迅辦地方官吏激變殃民更應從嚴糾劾毋得稍涉瞻徇自干重咎原摺著鈔給閱看將此由五百里諭令知之○癸巳正白旗漢軍副都統德興阿奏遵旨迅剿瓜州賊匪得旨朕聞汝在營奮勇當先管兵嚴肅嗣後益當竭力報效以副委任○乙未諭軍機大臣等前因楊需奏請飭調荊州官兵當有旨將魁玉一員畱荆交官文調遣其餘楊昌泗等各員卽令將原帶兵勇全赴襄陽悉照楊需原議分路前進嗣據該署督以魁玉楊昌泗之兵已行抵監利正可會合湖南官軍進剿奏請毋庸折回另調襄陽兵勇由襄河直下爲兩路策應亦經降旨照議籌辦軍情移步換形原不可拘泥從事惟在該署督隨

時體察相機辦理本日據官文等奏稱魁玉楊昌泗一軍從大江
北岸隨剿隨進已於初六日與卽用道李孟羣兵船會合一處先
將螺山以下兩岸餘匪按盡卽會同兩省兵勇順流下擊仍派李
光榮水勇及湖南水勇以爲後應又令參將恆泰守備宗維清知
縣吳振鏞等各帶兵勇取道新隄以扼水陸要隘並分剿倒口等
處餘匪是荆郡派剿官兵與塔齊布曾國藩水陸各軍已可沿江
夾擊而下不日卽應進偪武漢楊需前奏於十八日移營前進所
統兵勇已不爲單當此上游進攻得手之時則下游進兵愈不可
緩無論漢川是否收復亦不得因此牽掣全師或應分防或應截
畱總期密速籌辦以神速之兵驅烏合之眾上下夾攻更易爲力
該署督務卽與楚南東下之師聯絡一氣迅圖進取魁玉已抵監
利卽毋庸折回荊州以便督率兵勇剋期會合斷勿稍事迂緩任

令該逆久踞堅城肆行滋擾所有邊日攻剿情形隨時據實馳報以紓廬念將此諭六百里加緊諭令知之○以克復湖北安陸沔陽二府州城實守備陳得新等花翎餘升敘有差○丙申向榮奏查該逆嘯聚太平府城復於金陵城外西南隅板橋善橋一帶築營分踞閏七月十三日傅振邦由丹陽進兵直抵距太平府十五里之臧漢橋先將伏路守卡之賊接獲多名張國樑訊知府城西南北三面均有內河繞護東路重濠引水中架吊橋連繫賊營四座防備甚密乃將兵勇分作三隊令頭隊偷出賊營之後渡濠伏於城下以二隊潛赴賊營縱火接應該參將等銜枚疾進十四日天未明時我兵馳近賊營該逆正在相持忽見城廂火起延燒賊營逆眾後顧驚惶不知所措我兵乘勢趕殺連破賊營偏近吊橋突有大股賊匪自城中衝出各兵勇奮力截殺城上礮石如雨勢

難近前傅振邦立斬退縮兵勇數人張國樑首先衝入賊隊眾兵
勇一齊擁上將賊眾撲落濠溝餘匪退過吊橋各兵勇乘勢爭先
搶城千總楊萬青目程翔蛟不避矢石先登城上砍倒守垛賊
目多人接應我兵張國樑及遊擊楊瑞乾衝進城中分投截殺突
有黃衣賊目兩人帶領匪眾短兵巷戰經兵勇立將賊目殺斃餘
逆殲斃不少兼有從西門奔出上船逃駛者適我大隊由城外趕
上沿河追斬並將賊船燒燬無算追至金柱關江口賊船一百餘
隻遁赴江北上游一帶我兵始撤回城統計殺死溺斃不下四五
千人擒斬僞官賊目不計其數焚燬大小賊船八百餘隻是日金
陵之賊復出巢窺伺先於龍脖子壑築營壘旋由通濟門雨花臺
等處出賊數千堵住七橋壘進路另出賊眾四股於上方橋隔河
一帶連築六營當派遊擊穆大本等帶領兵勇嚴扼通濟門洪武

門等處要路蘇布通阿與福興親駐七橋礮橋頭指揮策應派令參將長桂等各帶兵勇分路攻樹賊營我軍連燬賊營二座斬賊甚多該逆見我畱營人少突於雨花臺洪武門出賊兩股直撲七橋礮營盤蘇布通阿卽督令穆大本等率兵迎敵槍礮頻轟蘇布通阿被火燒傷鬚眉被燎福興右手受傷仍各督戰愈力穆大本矛刺賊目數名因用力過猛連馬跌陷河中參將蔡應龍守備虎坤元戴文英等往來衝殺該逆死拒不退適守備李定太帶廣西等省之兵至橫衝賊隊短兵奮擊殲賊數百人該逆不支相率潰走我軍爭先追擊俘斬甚多又據已革提督余萬清呈稱鎮江逆匪於十四日出巢窺擾經我兵擊退續據逃出難民供稱有瓜鎮併夥內竄蘇杭之語十五日復稱有賊船多隻由瓜州駛過鎮江當於十六日進兵於西北兩門襲獲勝仗正擬收隊該逆又分股

衝出余萬清與總兵劉開泰督兵分投迎勦無不以一當十疊刺騎馬賊目數人斃賊二百餘眾餘逆不能抵拒我軍乘勢追逼近城城上礮子如雨乃令收隊回營查張國樑捷勇見已調回大營復令傅振邦領得勝之兵由秣陵至土山潛出賊營之背務將上方橋賊壘設法掃蕩以便進逼西南善橋一帶並圖踏龍脖子賊營防賊竄逸之路惟是太平府城雖已克復而大營存兵尙少見催令吳全美葉常春督率師船迅速駛上太平府將高淳之鄧紹良一軍移出會合堵截並飛調甯國浙省防兵出堵黃池河口水陸聯絡進勦蕪湖其丹陽縣爲蘇常門戶已責成余萬清就近堵勦初十日探聞該逆於浦口之九洲八子溝等處築土城搭造高墩並用木簰架礮聯以船隻意圖阻我上下師船並以窺探江北北岸緊要萬分尤宜迅往攻毀經臣嚴札武慶責令就近進

勦並檄總兵李德麟將石埠橋各艇師駛上浦口及六合縣派撥兵勇划船會同水陸夾攻務期迅掃賊蹤肅清江面以杜北竄又奏臣大營在江甯省城之東南隅如洪武門及上方橋土山高橋門等處皆係臣大營後路賊匪見在上方橋紮營有直越高橋門之勢中間僅隔一水時慮偷渡蔓延先經分撥遊兵晝夜接替巡防十八日該逆闌入高橋門一股直走沙子岡欲向涇化鎮一帶竄擾一股分撲小水關欲鈔我大營之後我兵先馳抵水關整隊迎勦該逆擁眾來拒已革副將巴圖督同都司何振標等率勇橫衝賊隊擊斃騎馬黃衣賊一名逆眾驚走並將沙子岡賊後隊掣動均潰至高橋門適張國樑從旁鈔至縱橫肆擊俘斬千有餘眾該逆突圍回奔我軍跟蹤緊勦逼近上方橋水際該逆拌死拒敵守備李定太帶領奮勇一隊直衝撲入逆匪不能抵禦紛紛擠入

河中其已上浮橋之逆正在半渡又被我兵槍礮轟擊亂翻落水何振標衝上石橋追殺突被礮子中傷掀跌淹溺時賊爭渡浮橋將橋踏斷我兵遂分扼橋邊大加砍殺屍塞兩橋河水盡赤統計斬溺賊匪不下四千人內有偽丞相賴四秀偽提督石詳真及偽官賊目多人是日該逆復於兩橋連紮木筏偷渡過河於隄邊築砌兩營被遊兵攻毀一座對岸之賊過橋接應我兵用大礮連轟擊斃無算復沿河截殺該逆撲水淹溺五六百人我兵立將橋東賊營二座奪占凡未及過河之賊逃向土山一帶經我兵追殺無遺其連日敗逃逸賊並經江甯府知府趙德轍督率團練殺淨盡統計兩旬以來斃賊凡二萬餘人再此次陣亡都司何振標及十五日陣亡之遊擊穆大本與東壩陣亡之副將福廣應請一併飭部從優議卹上諭內閣向榮奏克復太平府城並金陵鎮江

攻擊獲勝一摺又片稱堵剿上方橋賊匪連獲大勝等語此次金陵大軍連獲勝仗鎮江賊匪亦受懲創軍威既振逆膽已寒該大臣卽應督率各路官軍並江面師船會合陳金綬等無分南北水陸並舉速籌攻復兩城肅清江路以紓朕宵旰憂勤毋再稍事遲延致負委任○諭軍機大臣等向榮奏金陵鎮江連獲勝仗該逆受創亟思竄越於浦口之九洑洲八子溝等處築城並用木簰架礮聯絡船隻意圖阻我師船以窺江北是浦口情形萬分緊要該處雖有武慶在彼扼剿而江北口岸分歧瓜州賊眾仍復盤踞牽掣向榮籌攻江鎮兩城並防東路處處喫緊深恐不及兼顧著托明阿迅卽兼程馳赴毋稍遲延抵營後卽將布置攻剿情形速行具奏將此由六百里加緊諭令知之○諭向榮奏克復太平府城並金陵鎮江連次獲勝各摺片逆賊被剿愈急竄突之計愈狡蘇

布通阿見受重傷上方橋西賊路尚未斷絕金陵大營仍屬在在堪虞正宜於屢勝之餘加以慎重明攻暗防不可稍存大意太平府城既經克復則吳全美師船即可乘勢上駛向榮所稱將鄧紹良駐紮高渚之兵移出並調甯國府浙江防兵出堵黃池河口與福濟前奏請浙兵駐守蕪湖大通等處同爲嚴扼南岸起見惟向榮之意慮賊由東壩而入蘇常福濟之意慮賊由青陽而入徽浙兩處並重亟應熟計兼權未可專恃浙兵致蹈各顧一隅之失浦口地方極關緊要旣爲扼賊北竄要衝又爲江面師船往來必由之路前據陳金綬等疊次奏報逆匪於九洲洲等處築壘紮筏冀阻艇師已飭總兵李德麟帶兵上駛並咨會武慶札飭六合縣分路進攻與向榮本日所奏大略相同但據翁同書前奏十三日武慶督兵進剿僅止小有斬獲並未能將該處賊營掃蕩殊爲可慮

向榮欲令陳金綬等分撥陸軍與武慶合剿而陳金綬以兵無可
分爲詞陳金綬等欲吳全美等艇師回剿而此項師船又須進扼
太平儻彼此推諉致賊壘築成我軍聲勢不能聯絡武慶所帶官
兵僅止二千有餘設有疏虞所關匪細著向榮陳金綬雷以誠等
飭令武慶與李德麟等水陸夾擊務使賊無立足之地此係緊要
關鍵與平時防堵浦口不同武慶素有膽略必能力遏賊鋒見在
托明阿尙未到營向榮不得稍分畛域專顧江南是爲至要浦口
帶船之署副將周希濂前經武慶飭催輒以船單諉卸見在是否
隨同李德麟等進剿如再藉詞觀望卽著據實嚴參陳金綬等前
奏已令陳世忠水師進駐段要口向榮見奏責成余萬清堵扼丹
陽均著嚴飭各該員實力防剿以杜賊蹤窺伺蘇布通阿屢次督
戰奮勇當先朕心正深嘉獎茲因親自督陣被火燒傷甚至鬚眉

皆燎猶復悉力指麾覽奏殊深懸念著發去如意拔毒散十料交該將軍祇領務卽加意調攝冀得速痊其成偉績以慰眷廬將此出六百里加緊諭知向榮陳金綬雷以誠並傳諭武慶知之○諭駱秉章奏通籌防剿大局並飭紳民捐辦船礮各摺片前以岳州緊要疊諭駱秉章等飭令胡林翼帶兵前往防堵旋經曾國藩等奏請將該員帶往湖北復經降旨允准其岳郡防守事宜諭令派員接辦茲據駱秉章奏稱岳州必須重兵駐守方爲計出萬全湖南官兵之曾經戰陣者均已調赴湖北若胡林翼復行隨征則該郡實無可倚恃等語岳州一郡爲湖南全省門戶卽爲四川滇黔等省藩籬逆賊屢次窺伺雖經擊退防範更宜嚴密且該處駐有重兵則曾國藩等統師東下可無後顧之虞著駱秉章等卽飭胡林翼仍駐岳州毋庸隨往湖北並飭令督率兵勇嚴密防堵以爲

曾國藩等後路聲援若武漢賊匪被剿下竄岳州防堵較緩仍可
飭令胡林翼出境隨剿惟在該撫等體察情形熟籌妥辦至製造
船礮尤爲防剿要務既據駱秉章奏稱該省紳士情願捐辦卽著
督同在籍學士丁善慶等速行購料興工將應用船礮等剋期造
鑄並廣勸捐輸以期寬爲籌備如所調之浙江知縣龔振麟等尙
未到楚卽著咨廣東採辦夷礮以應急需此項船礮係由捐辦著
免其造冊報銷其捐貲監造之紳民人等並准其照籌餉例請與
獎敘以示鼓勵將此由六百里各諭令知之○予江南陣亡副將
福賡等祭葬世職○是月緩直隸河間阜城等十一縣被擾村莊
新舊額賦賑交河等五縣災民免直隸滄州等三州縣暨豐財等
三場被擾竈戶舊欠鹽課緩徵山東德州等十六州縣四衛新舊
額賦